

中南軍政委員會
民族事務委員會
材料字第 55 號

資興縣志

書田珍藏

書田珍藏

資興縣志

興甯縣志卷之十七

署興甯縣知縣郭樹馨原修
興甯縣知縣劉錫九纂修

藝文志

藝文下

賦計六首

江漢朝宗賦

至正辛巳湖廣鄉試第一黃師郊邑人

元黃莫極混沌攸分屹岷峨之西時發天乙之元精
沛靈液以長流亘天南之緯經激逸勢以遄驅送馳
波於滄溟譬萬國之會同咸疾趨於紫宸茲江漢之

東注所以著朝宗之微稱者歟時其春濤浩漲萬壑
流液駭浪翻空天網浮涵激三漚而霆喧浸峽雲而
影沒騰蛟鼓躍而噴風怒蜺霍揮而翳日長驅振鐵
騎之西來交流若附庸之畢集望滄海之茫茫倡百
川而全入雖百折而必東靡回波之頓息茲非諸侯
春見而曰朝於以覲王庭而述職者乎又若陰風怒
號觸浪排空亘浸稽天而浩浩驚濤觸石以溶溶始
兩川之竝駕終合勢而景從雷轟於大別之下電繞
於廬阜之衝渺乾坤之蕩蕩蘸旭影之瞳瞳飛流駭
奔走塗山之玉帛狂瀾澎湃集王會之琛琮茲非諸

侯夏見而曰宗於以朝京師而會同者乎余嘗快西
風之曉晴駕西龍兮北征朝吾邁兮江浦夕余憩兮
漢濱覽形勝之茫茫黯寒烟兮夕汀洞庭南瀉蕩天
光之一碧赤壁西望俯洪流而下臨蜀山逶迤而送
色楚澤浩渺而連雲鳬鷺低徊於烟渚葦花點綴於
寒津濯纓乎滄浪之浦游目乎鵠山之岑余於是有
所感焉思昔龍門未闢環海湯湯慨尾閭之未洩肆
川后之陸梁惟聖神之惻然乘四載而徬徨經嶠冢
以導漢隨岷山而入江障狂瀾而東驚若日月之回
光迨夫乾清坤甯岳奠川會羣流循徑以汨滴飛滂

摧雲以距海各順序而安行孰奔騰而橫潰觀物理
之有常等民彝之不昧思禹功於當年實萬世之永
賴嗟夫觀水於穹壤之間知物有君臣之義大而麗
天之象緯微而在物之螻蟻雖氣類之萬殊實均具
夫此理何世降於春秋迴霸圖之殊異嗟河陽之書
狩秉麟筆之微意在桓文而尙爾於吾楚乎何忌觀
逝者之如斯能不怵怩而愧死此余於江漢之朝宗
安得不悵然而長喟惟聖元之御極總萬國以來庭
雖海隅之遐陬亦梯航而貢琛藐余忝於楚產懷朝
宗之至心鼓三汲之巨浪振修鱗於禹門爰寄悰於

江漢聊抒意於斯文

承露盤賦

至正甲申
禮閣第一黃師郊

客有攬渭城之秋色駕茂林之西風訪柏梁於魏闕
挹瓊液於仙銅野粉蛻椒壁之封燒痕慘銅狄之容
苔蝕雨兮荒階樹棲烟兮故宮慨武皇之何在悲往
事之無窮想斯時也六合塵清九溟波靜紀天瑞於
白麟詠鐃歌於寶鼎雲亭秘玉檢之封海上矗鸞旗
之影厭塵寰之日促慕蓬萊之路近集方士於禁庭
招赤松於仙境煉甲庚而吞吐吸烟霧而導引爰首
創夫金仙拾露華於盤頂於是碎首山之礦煉太白

之精紫電飛鑪輔之燄罡風鎔膏白之英金鴉曉飛
刷直羽而驚翻玉龍夜飲啖元液而無聲良工奏技
宮官告成圓象蓬嶠之頂高侔天柱之形恍奇功之
神造揭雙立之修莖抗金人於寥廓軼埃溘以凝神
玉筍括空掬清冷於碧落瓊杯吐耀映素彩於觚稜
時其玉宇秋清銀潢星渡素娥舞羽於廣寒靈匹塞
旗於河鼓秋堂納涼氣之新金井靄華霏之墜蘸瑤
草以生寒溼龍旗而拂曙金莖朗植擎沆瀣於初收
玉笋朝盈注神漿於斯聚浮輝映淵客之夜光流潤
煥方諸之明水帝乃碎元圃之瑤華屑藍田之玉葉

和以玻璃之卮酌以天瓢之醕瓊波粲粲而光浮玉
液森森而浪吐一飲而百感潛生再飲而五官清粹
可以淪緱山之子晉可以觴瑤池之王母又何必咀
絳雪於崑崙搗元霜於玉杵且帝之飲斯露也意將
仍羽客於瑤臺邀羨門乎天露鼎湖攀留劍之龍蓬
島駕沖霄之羽服御白雲之鄉脫屣九重之位則庶
乎可以答求仙之心素而金仙之功於是乎著矣雖
然予嘗披史籍而遐觀竊有感於斯故夫何武皇以
雄才大略之君而乃惑溺於方士妖人之侶神遊八
表之中轍滿九州之士心鶴遊而莫羈意馬馳而莫

馭馬肝文成之誅仙跡公孫之侮尙畱宿於東萊何
帝心之弗悟且是盤也何不鏤日新之湯銘刺丹書
之周語於以保合天倪多歷年所柰何植巨臂於空
庭費精神而無補迨夫黃金不變青鳥音稀悲山陵
之日近悵三山之路迷而紫鳳下輪臺之詔秋風歌
汾水之詞顧蟠桃之不實嗟少壯之幾時對銅仙而
懷愧空感泣而生悲已矣哉桂華滿兮明月輝扶桑
曉兮白日飛候館空兮人已去茂林荒兮綠草萋生
存華屋零落空虛麒麟裂背上之文虬龍折領下之
珠石馬空嘶於荒塚露盤幾載於宮車嗟銅仙兮有

知揮鉛汞兮淋漓耿予懷之好古安得不爲之感慨
而歔歔遂呼銅仙而歌之曰飛光飛光兮曾不少畱
元氣茫茫兮浩不收三十六宮兮土花稠劉郎一去
兮今焉求酸風東射兮烟凝眸眼波流斷兮滿眶秋
銅仙銅仙兮君莫愁吾將攜子兮歸丹邱

登雲蓋仙賦

邑恩貢任 陳元旦 賓陽
贛榆知縣

歲闋逢之攝提兮適夾鐘之佳辰迺齊明而致肅兮
陟雲嶽以伸禋厯宵旰之凡七兮時瞻眺而愜頻覽
茲山之佳勝兮若觸乎其眸而悅乎其神聿抽毫而
作賦兮爰以張大其嶙峋粵自元黃肇闢兮二五森

列不直昆明之切灰兮每迭盈而迭竭卽此管壕之
流峙兮亦遞融而遞結余觀夫雲蓋之爲山也屹然
崿崿矗矣截辟礧礧乎甯埠之陽盤紆乎縈隈之垓
儼奇巘之岐嶒殆天造而地設逕繞梯懸巖虛洞澈
飛閣竄於青冥兮僊刹倚於元穹瞻綢繆之垂垂兮
儼華蓋之蒙蒙或紆翠岫兮或捲碧空堪以作霖兮
時乎從龍雲雖無心而漠漠兮山實與雲合併而莪
莪騰巔環眺兮恍出重霄南望瑤雲兮北顧堞雉之
遼睹羲馭之東曙兮覽蟾光之西照高瞻天表兮析
大圓之非造俯瞰閭閻兮鄙塵市之喧囂望懸磴之

崇輦兮跨川澗而越超四盼陬曲之騷騷兮又迴繞
而如弔有傍靈麓以爲宮兮像伯陽其委蛇儼狎舉
而凌虛兮若翩翩而翹翹彼溪澤而飛環兮時漉液
以流漪嗟韶華之荏苒兮驚節序之推移乃今蒼靈
秉政兮陰謝陽施忻原上之枝向榮兮怵塢閒之卉
繁滋感萼吐而葩含兮紛紛而藉藉若麟呈而鳳翥
兮儀儀而師師瞻彼雲蓋之嶙峋兮殆藉春暉而見
奇吾想夫青陽告謝兮朱明肇授迺修景於南陸兮
布鬱蒸於宇宙屆蕤賓以紀時兮煽景風而應候苦
溽暑之流金兮憩濃陰於在宥相彼雲蓋之嶙峋兮

若資炎燠而增秀迨夫三庚旣伏兮次以入郊之新
涼驚商氣之滿林兮隨蕭瑟而萎黃羨秋蟾之清皎
兮更桂萼之芬芳樂萬寶之告成兮喜東籬之紆香
嘉彼雲蓋之頽砭兮似假秋色而彌張若夫鶉火之
旣中兮倏盛發之隆烈悵百卉之具零兮怡六出之
飛冽徧銀妝於蔀屋兮且玉飾乎仙闕羨梅萼之揚
芳兮愛松竹之挺節奇彼雲蓋之豁啁兮又與霜雪
而並潔亂曰山雲起兮翩翩雲作蓋兮颯颯山於雲
兮裊裊雲於山兮脩脩彼嶠壺之寥寥兮何如蓋嶽
之翹翹

雲蓋山賦

以蓬壺冷浸三秋月石洞虛涵五夜風爲韻

李會福

邑增生

維山嶽之靈秀實大地之渾融原盤鬱乎太始乃永
著其蘊崇第所生之偏陂罔正位以居中亦無以表
神奇之獨闢而標作鎮之雄覽雲山之竦峙儼生成
之化工殆天造而地設輦邑運於昌隆斯鍾毓之非
偶雲氣鬱勃以蓬蓬爾乃巍聳崛起弗律崎嶇輪囷
其體磊砢其膚形魄礪以崑崙勢螭蟠以縈紆聳南
離而獨秀鎮郊闕以壯圖歸然而挺峙兮踞一邑夾
會之都矣矣於中央兮當兩山環拱之隅管壕之屏
峰卓爾都城之保障巍乎豈徒爲輿圖之覽勝若員

嶠與方壺蓋其矗立交衢亭亭虛同緯以三山環以
五嶺若仰若拜羅衛四境象應中星之聚似合璧以
聯珠形如砥柱之栽應捫參而厯井壯萬室之觀瞻
擅一郡之風景於焉連步以上正是心曠而神怡厯
級以登儘可目遊而懷騁靄靄乎風月融和霽霽兮
露華清冷原夫山所由名蓋出雲而成譏靈異之薰
蒸靡常佳靄之郁葱特甚故常有紫雲張幄丹霞垂
蔭有如華蓋之象結彩色於山岑幾似君山之螺擬
氤氲乎巨浸至於懸崖如怒曲磴如愁猗猗笑立偃
蹇平參嶽嶽兮徑分窄面礪礪兮壁陡烟含石筍角

立而鬢鬢兮古木蒙蔽以穆穆掛藤蘿之飢蔓披綠
苔之鬢髮雖無琪花瑤草之盛而離奇笑兀以聳翠
者不啻擁陸地之蓬瀛方丈而媲乎海島之三故越
羣巒而獨處直負絕乎囂湫蒼蒼古秀羅羅清幽不
依阿以成形而花鳥自爲春秋也惟是山勢崇隆山
峰砗砢前仰後偃不脫不竭旣端凝以聳秀復磅礴
而起岬莫盤石而埒坤維向離明而捧天闕此所以
艮止得所厚重有常而綿亘乎歲月也且山體之豐
隆實胎息夫地脈生面開瀟鬱淳故能極形勝之觀
含生物之澤何得以廣大未能而涉之乎卷石若乃